

Rebat selesai awal pinjaman PTPTN

MERUJUK kepada Surat Pembaca Mohd Firdaus Mokhtar bertarikh 12 Januari lalu mengenai kos pentadbiran pembayaran balik pinjaman pendidikan PTPTN, adalah dimaklumkan, seperti dipersestujui dalam perjanjian, pinjaman PTPTN dikenakan kos pentadbiran tiga peratus setahun berdasarkan baki pokok bulanan berkurangan.

Dalam hal ini, pengiraan jumlah kos pentadbiran yang dibuat oleh penulis dengan mengandaikan pinjaman PTPTN RM3,000 dan pembayaran balik dijadualkan dalam tempoh tiga tahun (36 bulan) dikira dengan $RM90 \times 36 = RM3,240$ adalah tidak tepat. Kos pentadbiran dikira berdasarkan tiga peratus setahun yang dikira pada setiap bulan berdasarkan baki pokok bulanan berkurangan. Apabila bayaran balik dibuat oleh peminjam, kos pentadbiran (termasuk tunggakan) akan diambil kira terlebih dulu, manakala lebihan bayarannya akan digunakan untuk penyelesaian pinjaman pokok.

Dengan mengambil kira contoh penulis, seorang pelajar meminjam sejumlah RM3,000 dan dijadualkan untuk membayar balik selama tiga tahun (36 bulan) dengan ansuran bulanan berbentuk progresif. Pada tahun pertama, pelajar dikehendaki membayar ansuran bulanan sejumlah RM65.94 merangkumi prinsipal RM58.44 dan kos pentadbiran RM7.50.

Pada tahun kedua pula, pelajar dikehendaki membayar ansuran bulanan berjumlah RM85.72 merangkumi prinsipal RM80.00 dan kos pentadbiran RM5.72. Perbezaan ansuran ini lebih ketara pada penghujung ansuran (bulan ke 36), di mana bayaran ansuran adalah sejumlah RM111.44 merangkumi prinsipal RM111.16 dan kos pentadbiran RM0.28.

Oleh itu, jika dikira jumlah kos pentadbiran sebenar dalam kes ini hanya RM157.09 sekiranya pembayaran balik pinjaman dibuat mengikut jadual ditetapkan dan bukannya RM3,240 seperti pengiraan penulis. Peminjam akan menikmati rebat sekiranya menyelesaikan pembayaran balik pinjaman pendidikan PTPTN dengan lebih awal. Penjelasan lanjut boleh dibuat di talian 03-2092 7788.

IQLIMA ISHAK,
Pegawai Perhubungan Awam
Perbadanan Tabung Pendidikan
Tinggi Nasional (PTPTN).

Benfa Hanan

19/1/08 (Sabtu)